

Decano di Orde di Abogado di Corsow ta manipula opinion publico

ORANJESTAD/Willemstad--- Universidad di Corsow UNA ta keda den enfoke di discusion. E instituto academico, cu tin hopi estudiante Arubiano inscribi, ta den un confrontacion directo cu Decano di Orde di Abogado Karel Frielink. Manera ta conoci, Diabierna ultimo a duna Frielink, kende ta docente invita na facultad di derecho di UNA, su retiro inmediato. E informacion cu e abogado a haya ta cu el a representa ex Rector Magnificus Miguel Goede den su caso contra UNA, cual el a gana tambe. Frielink a acusa Rector Adhunto dr. de Lanoy di a cay pa presion di Hunta di Supervision cu ta consisti di miembronan di e partido Pueblo Soberano, kende-

nan lo a procura pa politica y presion politico drenta e instituto. Dr. de Lanoy a reacciona bisando cu UNA mester por conta riba colaboradornan cu tin curazon pa henter e organizacion y cu den conhunto ta traha cu dedicacion pa realisa obhetonan di e Universidad. Aunke cu en principio no ta bay nunca den publicidad riba asuntoonan di personal, e comentarionan di Frielink ta forsa direccion di UNA pa reacciona. Motibo ta cu ta insinua cu Hunta di Supervision a inicia un wega politico cu Mr. Frielink, door di termina su relacion di trabou. Dr. de Lanoy ta desmenti esaki enfaticamente y ta bisa cu bou e direccion actual

incluso di parti di Hunta di Directiva, no tin espacio pa metemento ni infiltracion politico. Lo no tolera esaki tampoco, de Lanoy a bisa. "E hecho cu Mr. Frielink ta trata di relata su retiro na metemento politico ta di lamenta y mester ta basa riba reflexion y ta posiblemente un desenmascaramiento propio." Segun ley di UNA, e maneho di UNA ta cay directamente bou responsabilidad di e Rector y ta e propio Rector adhunto a tuma e decision pa no haci mas uzo di servicionan di Frielink como docente invita, basa riba su propio evaluacion. "Hecho ta cu na momento cu Mr. Frielink, na Augustus ultimo ta e representante di ex Rector Goede, a con-

sidera esaki como algo extraño." De Lanoy ta haya cu e paso riba su mes ta muestra di ta actua contra etica profesional. Central na esaki ta un posibel conflicto di interes y falta di norma. "Tambe UNA a manda un carta pa Orde di Abogado riba su dudanan relaciona cu e involucramento di Mr. Frielink como representante di dr. Goede contra UNA y a pidi opinion di e organizacion. Pero te awe UNA no a ricibi un reaccion di Orde di Abogado." Rector adhunto de Lanoy a muestra cu ironicamente ta e propio Mr. Frielink ta Decano di Orde di Abogado. Den concepto di de Lanoy, e abogado ta purba manipula opinion publico, unda e ta uzando studian-

tenan pa logra su obhetivo. E prome tarea di un decano di facultad di ley ta pa garantiza calidad di continuidad di enseñansa y ta algo cu directiva di UNA ta spera tambe cu ta pasa. "E tempo cu ta uza UNA unicamente como garoshi pa logra beneficiar personal y pa drecha curriculum vitae propio door di haci uzo di e posicion di docente di UNA a pasa." Den concepto di Rector Adhunto Francis de Lanoy, e pregunta cardinal cu tur hende mester haci ta con un organizacion profesional cu ta respeta su mes lo por keda traha cu un persona cu tey pa unicamente pa su propio probecho y ta procede contra interes di su dunado di trabou." □

Infiltracion politico na UNA ta un hecho segun decano di Orde di Abogado

ORANJESTAD/Willemstad— Decano di Orde di Abogado di Corsow Karel Frielink no ta tuma e acusacion di ta manipula opinion publico sin mas. Manera ta conoci, Universidad di Corsow, UNA a caba di duna e docente invita su retiro inmediato. Motibo tabata cu el a actua contra interes di e institucion, door di representa ex Rector Miguel Goede den su caso contra e Universidad, cu tin tambe un cantidad di estudiante Arubiano. Rector adhunto dr. Francis de Lanoy a acusa Mr. Frielink di a haci uzo di e posicion di docente invita pa mehora su propio curriculum vitae sin pone interes di UNA na prome luga, y cu como Decano di Orde di Abogado no a actua eticamente na momento di ricibi un carta di e Rector riba su funcionamiento como docente y alavez abogado di dr. Goede. Frielink ta considera e reaccion di UNA como un gloop bou faha y cu e no ta nada otro cu un otro atake. "E ta un intento hopi cla pa trece den discusion e reputacion y integridad di mi persona,"

Frielink a bisa. Ta for di Augustus ultimo cu UNA sa cu e ta duna e asistencia legal na dr. Goede. Pero a warda te 20 di Januari 2012, pa e decano di facultad di derecho inform'e cu no kier haci uzo mas di su servicionan como docente invita. "Esey ta 5 luna despues. Y esaki mientras cu e lesnan ta cumenza dia 31 di Januari. Y tur e lunanan ey mi tabata totalmente involvi den preparacionnan di e programa di les." Hasta un siman prome cu su retiro inmediato, Frielink tabata involvi den discusionnan den facultad huridico pa un materia nobo. "E anuncio di mi retiro como tal a bin como un sorpresa. Ta apenas awor a tuma e decision pa retira mi. Pasobra Diasabra ultimo ainda tabata buscando un reemplazante." Esey ta bisa hopi di e forma con UNA ta anda cu interes di estudiante, ta su opinion. Frielink ta enfatisa cu e gratificacion cu e tabata ricibi pa duna les no tabata un suma cuantioso, y e no tabatin haya pago pa e asistencia cu e tabata duna studentenan cu nan

tesis. Su motivacion tabata e entusiasmo di e propio studentenan. E hecho cu e tabata duna les como docente invita y a representa ex Rector Goede den su caso contra UNA no ta un conflicto di interes den su concepto. Frielink a muestra cu no tin ningun regla of procedura cu ta prohibi esaki. "Ta dos funcion cu no tin nada di haber cu otro. No tin ningun regla contra. UNA sa esey tambe, y pa e motibo aki kier trece mi den descredito." Mr. Frielink ta nenga di a haya un carta di UNA riba su asistencia legal na Miguel Goede, y ta nenga tambe cu Orde di Abogado a ricibi un carta al caso. "UNA como tal ta trece duda den integridad di Decano den Orde di Abogado." E abogado ta haya cu ta net UNA ta mustrando un comportacion no profesional di parti di su dirigentenan y cu e principionan di bon gobernacion y di un organizacion profesional ta riba papel so, ya cu no ta teniendo cuenta cu esakinan den e maneho di UNA.



Decano Orde di Abogado Corsow Karel Frielink.

"For di Augustus a instrui tur persona pa procura di no crea impresion di ta traha contra UNA y Hunta di Supervision a pidi Rector Adhunto pa tuma paso contra esnan cu lo ta actua contra UNA. Un otro docente a califica esaki como tactica

di intimidacion." Frielink ta muestra cu dr. de Lanoy ta haci locual Hunta di Supervision kier pa e haci, un hunta cu ta consisti di representantenan di Pueblo Soberano. "Esey no ta muestra di infiltracion politico?" □